

Nunatta kangianut tulluarsakkamik ilinniarfimmik, Tasiilami inissineqartussamik pilersitsinissaq pillugu Naalakkersuisut siunnersuusiornissamik peqquneqarnissaannik Inatsisartut aalajangiiffigisassaattut siunnersuut. Ilinniarfik assigiinngisitaartumik ilinniarfiullunilu piginnaasaqalerfiunissaa tunngavigneqassaaq. Siunnersuut UPA2027-mi saqqummiunneqassaaq.

(Inatsisartunut ilaasortaq Nivi Rosing, Inuit Ataqatigiit)

Siullermeerneqarnera

Qujanaq siulittaasoq

Siullermik siunnersuuteqartoq, Inatsisartut ilaasortaat Nivi Rosing, Inuit Ataqatigiit pingaaruteqartumut siunnersuuteqarneranut Naleraq sinnerlugu qutsavigaarput.

Eqqartorneqartussatut qaqqineqartoq, ataatsimut isigalugu erseqqissumik oqariartuuteqarpoq:

Tunu pisariaqartitsivoq.

Inuusuttut innuttaasullu periarfissaqarusupput.

Tamanna ilumoorpoq, taamaammat Naleraq oqarusuppoq Tasiilami aammalu Tunumi ilinniarnissamat periarfissat annertusarneqarnissaat ullutsinni nunatsinni pingaaruteqarluinnartuuvoq. Nunatsinni inuusuttut tamarmik sumi najugaqarnerat apeqqutaatinnagu assigiimmik periarfissaqartariaqarput taamatullu Naleqqamiit politikkerarput pingaartitalugulu nunatsinni isorartuumi inuuffitsinni sinerik tamaat ineriartornermut peqataatinneqartuarnissaa.

Ullumikkut ilinniarfiit amerlanersaat kitaani inissisimapput. Taamaattumik inuusuttut amerlaqisut Tunumiit ilinniagaqaqqinniarlutik angerlarsimaffimminnik ilaqttaminnillu inuusuttuunerminni qimatsisariaqartarput. Tamanna inuusuttunut oqimaatsuvoq, aammalu ilaatigut ilinniarnermik unitsitsinermut pissutaasarluni aammalu aggerminnut uteqqinngittoornermi kinguneqartarluni.

Taamaattumik Naleqqamiit oqarusuppugut Tasiilami ilinniarfinnik pilersitsinissaq pillugu suliaqarnissaq pisariaqarpoq aammalu tamanna nalunaarusiornissamiit naapertuunnerusutut isigaarput.

Siunnersuummut tunngatillugu tamanna aatsaat qaqqineqanngilaq assingusumik Inuit Ataqatigiit tungaanniit assigiinngiaartumik qinigaaffiit ilaanni qaqilerisoqartarpoq allaat aamma efterskoleqalernissaat qaqilerisoqartarnikuuvoq, ajoraluartumilli piviusunngortinneqarnikuunngisaannartarput.

Ukiorpassuanngortuni tamakkut siunnersuutit piviusunngunngitsoortinneqaannartartut isigiurpugut, uffalu siunnersuuteqartartut partii tunuliaqutigisaa ilaatigut Naalackersuisuutitaqartuusaluartut. Kiisa tupinnarsilerpoq sooq piviusunngortinneqartannginnersut aamma sooq misissuinermut nalunaarusiamut sangutinneqaqqiinnarnersoq, naak nalunngikkaluarlugu Tasiilaq ilinniarfimmi pisariartitsisoq.

Naalackersuisulli akissuteqaataat misissuataaraanni tupinnaqisumik maluginiarparput.

Naalackersuisut namminneq nalunngikkaluarpaat Tunumi ilinniarnissamut periarfissat amerlanerusut pisariaqartinneqartut, kisianni suli misissueqqinnissaq nalunaarusiornissaq toqqartuartaarpaat, piviusunngortitsinissamut suliaqarnissaq toqqarneqarneq ajorpoq, aalajangersimasumik suliniuteqarnissamut piunmassuseqanngitsutut isikkoqarluni aammaartumik una siunnersuut killiffeqaqqilernersoq Naleqqamiit apeqquserparput.

Tamanna Naleqqamiit paasisinnaanagu tupigusuutigaarput, ilami ataatsimiinnerni arlaqalersuni oqaatigineqartuartaarpoq Naalackersuisuutitaminnik ataatsimooqqissaarlutik siunnerfeqarlutik oqaloqatigiittarlutillu pisut, taamaakkaluartoq naalackersuisooqataasumiit siunnersuutigineqartoq.

Una pisariaqarluinnartoq nalunaarusiornissamut sanguteqqiinnarneqarpoq, taamaamallu aamma Tunu pineqartillugu amerlanertigut ataatsimuussutigineqanngitsutut ersertartoq Naleqqamiit maluginiartalernikuugipput. Naleqqamiit misissuinermut nalunaarusiornermut siunnerfeqartoqaqittoq assut pakatissutigigatigu oqaatigeriissavarput ataatsimoorluni taamatut siunnerfeqarneq ilungersunartutut isigaarput.

Isumaqarpugut Tasiilami ilinniarfissamik pilersitsinissaq pingaaruteqarluinnartuusoq, aammalu tunumi ilinniarneqarsinnaasut periarfissat annertusarneqartariaqarluinnartuusut. Suliassaq siunnersuutigineqartoq ukiut ilaanni qinigaaffinni eqqartorneqartareernikuuvoq, tassa pisariaqartitsineq ilisimaneqareerpoq, innuttaasut kissaataat qangaaniilli ilisimaneqareerput.

Taamaattumik aperisariaqalerpugut: Qaqugu kissaatit timitalerlugit piviusunngortitsinissamut iliuseqarfigineqalissagami? Sooruna misissuinerit nalunaarusiornerit iliuseqarnaveersaarluni ingerlanneqaannavinniartut? Tunumi innuttaasut inuusuttullu ukiuni amerlavallaani neriorsorneqartuartaarsimapput, sulili piviusumik annerusumik iliuseqarfigineqarsimangillat, maannalu aamma

Naalackersuisut nalunaarusioqqinnermik misissueqqiinnarnermillu saqqummiussaqaarlutik ajornartorsiut aammaarlutik kinguarsaqqilernerpaat? Tasiilami ilinniarfimmik pisariaqartitsineq nutaajunngilaq. Tunumi inuusuttut ilinniagaqalerniarlutik ilaqquttatik qimallugit sinerissap sinneranut aallartariaqartarput, ilinniarnermik unitsitsiinnartartut takussaasarput imaluunniit aallartinngisaannartarput.

Tamanna naluneqanngilaq ilisimareerparput, taamaattumik Nunatta kangiani ilinniarfimmik pilersitsinissaq pisariaqarluinnartuuvoq.

Naleraq ernumavoq misissueqqinneq misissueqqissaarneq taamatullu immikkut ilisimasallit aatsaat suliseqqaarlugit politikikkut amerlasuutigut isummerniarartoqarsinnaasarnera, ilinniarfimmik pilersititsiniarnerigaluit piviusunngunngitsooqqiinnartarmata. Una siunnersuut aamma taamatut inissinneqaaqqilernersoraasit ernumassutitta ilagaat, tamakku tamaasa eqqarsaatigalugit Tunumi ineriartortitsinissamik siunnersuutinik piviusunngortitsisannginneq kinguarsaataasaqaaq, tassami illoqarfiit mikinerusut pineqaleraangata utoqqatissutissarsiuqinnartarnerit imaaginnavittarput, kinguarsaatissat amerlasuutigut pineqaannavittarput misissuereernermilu amerlanertigut piviusunngunngisaannartarlutik.

Aalajangiinerit paasissutissanik tunngavissaqarnissaat isumaqatigaarput. Kisianni misissueqqissaarnerit politikikkut piumassutsimut taarsiunneqassannginnami? Ingammik pineqartoq Tasiilami ilinniarfeqalernissanut tunngasoq uani qassissaa eqqartorneqassagami? Naleqqamiit oqarusuppugut Naalakkersuisut aalajangiinnaassuseqannginnerat aamma Tunumut ineriartortitsinissamik piumassuseqannginnerat takuteqqiinnarneqartoraasit. Aammaarluni nalunaarusiorluni utaqqiinnarissaq innuttaasunut nikallornarpoq.

Tamanna naammagineqarsinnaajunnaarpoq.

Naalakkersuisut pisariaqartitsinermik misissueqqissaarnissamik ingerlatsissappata, taava taanna ersarissumik iliuuseqarnissamut tunngatinneqartariaqarpoq. Taamaattumik ilaatigut imaqartariaqarpoq:

Sorlernik ilinniarfiliisoqarsinnaanersoq.
Ilinniarfioereersunik suleqateqarnissamut periarfissat suusinnaanerini,
Aningaasaqarnikkut iliuusissat.
Kiisalu pilersitsinissamut piffissalersuinissaq.

Tassami ukiuni arlaqalersuni Tasiilami pissutsit pillugit oqaatsit kusanartut timitaqanngitsut innuttaasut tusassallugit qatsulluinnarpai, salloqittagaasarnertik qatsutiivillugu qatsuppaat, iliuuseqarfigisariaqavissorput, taamaattumik aqqummut pitsaasumut ilaatigut ingerlaarnissami pissusissamisoorpoq piviusunngortitsisoqarnissaa, ukiorpassuarnimi ilisimaneqareerpoq ilinniarfeqarnissaq pisariaqartinneqartuuvoq.

Pilersitsiniarnissaq ilinniarnermut kisimi tunnganngilaq, aammattaaq nunatta tamarmiusup naligiinnerusumik ineriartortinneqarnissaanut tunngavoq. Naleqqamiit erseqqissumik oqaatigissavarput Tunumi innuttaasut assinganik periarfissaqartariaqarput. Taamaattumik Tunumi innuttaasut pitsaasunik neriuuteqalersitsisunik oqaaseqaatinik pisariaqartitsinerat paasilluarsinnaavarput aamma Tunumi innuttaasut nalunaarusiamik allatullu misissueqqissaarnernik ingerlatsisoqarnissaanik pisariaqartitsinngillat. Misissueqqiinnarnissamik kiveqqiinnartussamik ingerlatitseqqinnissamik



tusagaqaannartariaqanngillat. Tamakku naammalerput iliuseqarfigineqartariaqavissortunukua.

Tasiilami inuusuttut nunagisaminni kulturiminnullu qaninnerusumi periarfissaqartariaqarput.

Inuusuttut tamarmik nunatsinni assigiimmik periarfissaqarnissaat ilumut isumaqarutta, taava siunissaat pillugu aalajangersimasumik aningaasaliinissarput sapiissuseqarfigisariaqarparput.

Tunumi inuusuttuusut innuttaasullumi nunatsinni innuttaaqataapput naligiimmik periarfissaqartariaqartut. Taamaattumik Naalakkersuisut iliuseqarnerusariaqarputsi ukiorpassuannngortuni nalunngereerparput Tunumi pisariaqartitsisoqartoq, arlalitsigut eqqartorneqartareerpormi, timalimmi piviusunngortinneqartariaqalerpoq, piviusunngortitsisariaqalerputsi, siunissamimmi nunatsinni kivitseqataasussaallunilu iluaqutaasussaavoq. Nalunaarusiornikkut kinguarsaqqiinnarneqassanngilaq.

Tunumi, pingaartumik Tasiilami, ilinniarnissamik periarfissat amigarnerat kinguneqarpoq inuusuttut amerlasuut meeqqat atuarfiata kingorna ingerlariaqqinngitsoortarnerannik. Tamanna inuiaqatigiinni suliffissaaleqinnermut, nuttarnermut aamma periarfissaaleqinnermut toqqaannartumik annertuumik sunniuteqarpoq. Tassa ataatsimut isigalugu Tasiilami inuusuttunut periarfissaat nunatsinni sinneranut sanilliullugit ajornerupput. Ilinniarnissamik amigaateqarneq kinguneqarpoq inuusuttut amerlasuut ilinniagaqarnatik inuulersarnerannik tamanna politikkikkut ukiuni amerlavallaani sumiginnarneqarpallaarujussuaqaaq.

Ukiut ingerlanerini arlaqalersuni nunatta kangiani Ittoqqortoormiuni aamma tunumi Tasiilami eqqaanilu ineriartortitsineq annertuumik sumiginnagaasimapput, tamanna allanngortinneqartariaqarluinnarpoq.

Naleraq isumaqarpoq sinerik tamaat eqqarsaatigalugu ineriartortitsineq naligiinnerusooq pisariaqarluinnartuusooq aamma tunumi periarfissaasariaqartoq. Tunumi innuttaasut nalunaarusianik amerlanerusunik pisariaqartitsinngillat periarfissanik pisariaqartitsipput, pisariaqartippaat aalajangersimasumik aallartittoqarnissaa.

Taamatut oqaaseqarluta Naleraq siunnersuummi siunertaq taperseraluarpaa aammalu Naalakkersuisut Tasiilami ilinniarnissamik pilersitsinissamut nalunaarusiorlutik misissueqqinniarnarat uggoreqaarput uggoreqaarpullu Inuit Ataqatigiit qaqilertaaginnavimmata misissueqqattaarnerit ingerlanneqaqattaqqiinnarlutik tamanna ilungersunartut Naleqqamiit isigaarput
Qujanaq